

Buru-azur¹ berbarik ez daukan baten berbak.

Nai badozu ekusi guztioen azkena,
 Mundutarren atsegin ta utskeriena,
 Begiok zabaldurik begira egidazu,
 Ause da parakizun gizon naiz andrena.

Begira buru-azur oni dagoan eran,
 Nun gelditu oi diran eder ta galantak,
 Ikuste, gusto, usaiñ, entzute, naiz ikutze,
 Sentidixen atsegin ta naikera danak.

Oraiñ euki ez arren zuk lako sentidurik
 Aldikada batean guztiak nituan,
 Iruditu egizu, nintzala Aita Santu,
 Errege, jeneral, naiz soldadu munduan.

Ispillu onetanche ezagutu dagizun,
 Gizonaren lurreko desengañotzarra,
 Aita Santu, Errege, jeneral, soldadua,
 Zertara biurtzen dan andi zeñ chikarra.

Merkatari sendotzat, nai badozu argaltzat,
 Pentsau naizu, Kristaua, nai nozun moduan,
 Bata bardin bestea, dirudun ta bagea,
 Zerren danok gagozan nakutsun tajuan.

Buru-azur leor, otz erdi apurtu onek,
 ¿Nun ditu len eukazan begi dizditzallak?
 ¿Nun ditu perlak basen agin ta ortz zuriak,
 Benturaz zuk dituzun baño askoz obak?

¿Nun ditu urre gorriz egindako ulleak,
 Bekoki edurki ta matrall larroskiak?
 ¿Nun okotz leun, biribil, nun ezpan koralezko,
 ¿Nun sur ta nun belarri añ ondo egiñak?

Ederren ziranean eriotzak bat baten
 Lapurrak legez urten ta arrapau eustazan
 Azur au soill ichirik, mamiñ samur guriak,
 Arrak eta zapoak jadanak jan eustezan!

FELIPE DE ARRESE Y BEITIA.



(1) Calabera.